

嘉業堂
叢書

金石錄

第五冊



金石錄卷之十七

跋尾七
漢

漢梁相費汎碑

漢堂邑令費君碑

漢費君碑陰

漢太尉陳球碑

漢華嶽碑

漢太尉郭禧碑

漢郭禧碑陰

漢郭禧後碑

漢樊毅西嶽碑

漢禹廟碑

漢冀州從事郭君碑

漢逢童碑

漢逢童碑陰

漢三公碑

漢穀阬君神祠碑

漢穀阬君神祠碑陰

漢無極山碑

漢揚州刺史敬使君碑

漢葉長蔡湛頌

漢蔡湛碑陰

漢安平相孫根碑

漢涼州刺史魏君碑

漢碭孔君神祠碑

漢梁相費汎碑

右漢梁相費汎碑在湖州其額題漢故梁相費君之碑
碑云梁相諱汎字仲慮此邦之人也其先季文爲魯大

夫有功封費因以爲姓秦項兵起避地於此遂留家焉
余家所收姓氏文字粗備以諸書參考頗多牴牾不合
姓苑云費氏禹後漢有長房蜀志有丞相禕又云今瑯
邪亦有此姓音父位反李利涉編古命氏云費氏出自
魯桓公少子季友有勳於社稷賜汶陽之田封邑於費
子孫氏焉漢有費將軍其後有費忠費柔柔適蜀爲甯
蜀人忠之孫徙於荊州後遷江夏忠十代孫奕奕孫禕
又家於蜀晉平蜀禕之子承復歸江夏林寶元和姓纂
云費氏亦音祕史記紂幸臣費中夏禹之後楚有無極

漢有直蜀有稭晉有詩又云瑯邪費氏直之後也陳湘
姓林云費氏音蜚夏禹之後余嘗考之此字有兩姓音
讀不同源流亦異其一音蜚嬴姓出於伯翳史記所載
費昌費中楚費無極漢費將軍費直費長房蜀費稭之
徒是其後也其一音祕姬姓出於魯季友姓苑所載瑯
邪費氏而此碑所謂梁相費君是其後也然則姓苑姓
纂姓林皆云夏禹之後姓纂又云亦音祕及謂瑯邪費
氏爲直之後皆其差誤而編古命氏以費將軍費稭之
徒出於魯季友亦非也余又按春秋僖公賜季友汶陽

之田及費而左傳亦以謂季友有功於魯受費以爲上卿今以爲季文有功封費者蓋碑之誤

漢堂邑令費君碑

右漢堂邑令費君碑云惟熹平六年無射之月堂邑令費君寢疾卒嗚呼哀哉於是夫人元弟卜肖追而誄之其後有銘詩碑所述費君事不甚詳悉而其名字世次官秩具載於碑陰今附於後

漢費君碑陰

右漢費君碑陰云君諱鳳字伯蕭梁相之元子九江太

守之長兄也世德襲爵銀艾相亞又云君踐郡右職三
貢獻計漢安二年吳郡太守東海郭君以君有委蛇之
節自公之操年三十一舉孝廉拜郎中除陳國新平長
遂宰堂邑其後爲五字韻語詞頗古雅而時時殘缺不
可次序其前題君明家中孫甘陵石勛字子才所述云

漢太尉陳球碑

右漢太尉陳球碑球有兩碑皆在下邳其一已殘缺此
碑差完可考前代碑碣與史傳多牴牾而球碑所載官
閥事跡與傳合東漢之末政在闔寺威福下移其勢蓋

可畏也而一時眾君子猶奮不顧身力排其姦雖遭屠戮而不悔志雖不就然亦可謂壯哉如球是已使當時士大夫能屈己以事之則富貴可長保矣然君子固未肯以彼而易此也

漢華嶽碑

右漢華嶽碑集古錄云碑以周禮職方氏爲識方氏者疑當時周禮之學自如此蓋識誌其義通也余按袁逢華嶽碑亦引職方氏乃用識字蓋漢人簡質字相近者輒假借用之初無意義爾

漢太尉郭禧碑

右漢太尉郭禧碑文字殘缺所存才百許字其可見者
公諱禧字君房而已禧郭躬從孫也其事跡附見躬列
傳云少明習家業兼好儒學有名譽延熹中爲廷尉建
寧二年代劉寵爲太尉而靈帝紀亦云是年十一月禧
爲太尉章懷太子注云字公房扶溝人也郭氏世爲陽
翟人自躬以下皆葬陽翟其墓尙存今此碑缺處猶有
陳留扶溝字疑禧嘗寓居是邑其卒也返葬故郡而漢
書注遂以爲扶溝人恐誤

漢郭禧碑陰

右漢郭禧碑陰其首有四大字云故吏人名其下列故吏密張立度成偃師張協子通雒陽李蒼子考故民河南陰德紀信以下凡百餘人又有右河南右河內郡右弘農郡右扶風郡字畫完好者甚多筆法淳古可愛

漢郭禧後碑

右漢郭禧後碑殘缺尤甚其略可辨者云惟光和二年夏五月甲寅太中大夫故太尉郭公薨又云公之胤子故五原太守餘不復成文而其額題漢故太尉郭公神

道字畫尙完云後漢書列傳既不載禧所終而靈帝紀但云建_南三年夏四月太尉郭禧罷亦不言其爲何官今以碑考之乃知其罷爲太中太夫而卒於光和二年也五原太守名鴻後爲司隸校尉封成安鄉侯

漢樊毅西嶽碑

右漢樊毅西嶽廟碑云_弘農太守河南樊君諱毅歐陽文忠公集古錄云據此碑乃卽時所立而太守生稱諱者何哉按春秋左氏傳周人以諱事神名終將諱之而禮卒哭乃諱鄭氏以謂敬鬼神之名也諱避也生者不

相避名衛侯名惡大夫有石惡君臣同名春秋不非又漢宣帝元康二年詔曰聞古天子之名難知而易諱也今上書觸諱以犯罪者朕甚憐之其更諱詢諸觸諱在令前者赦之蓋卒哭而諱其名實始於周而生死皆稱諱西漢已如此矣然則生曰名死曰諱又出於近世也有以見後世忌諱愈密如此然生而稱諱見於石刻者甚眾不獨此碑也

漢禹廟碑

右漢禹廟碑云光和二年十二月丙子朔十九日甲午

皮氏長南陽章陵劉尋孝嗣丞安定烏氏樊璋元孫其
後敘禹平水土之功而最後有銘文多殘缺不能盡識
碑在龍門禹廟

漢冀州從事郭君碑

右漢郭君碑名字已殘缺其額題曰冀州從事郭君之
碑碑云其先出高辛興自於周

缺一字

蕃虞郭在河魏之

閒遭晉荒疆乃喪厥土奕世孳孳職思其勳子孫纓布
家於樂土因國爲氏又云歷郡諸曹掾史主簿督郵五
官掾功曹又云光和二二年終三年十月葬又云哀哀考

妣追惟實靈卜商號咷喪子失明據此乃父母生而稱
考妣也爾雅云父爲考母爲妣郭璞注引禮記生曰父
母妻終曰考妣嬪今世學者從之而璞援據諸書以爲
非生死之異稱猶今謂兄爲舅妹爲媢爾今此碑漢人
所爲已不用戴氏之說以此知璞爲有據然禮經行於
世人既有此論事親者所當避也

漢逢童碑

右漢逢童碑刻畫完好云童子諱盛字伯彌薄令之④
孫遂成君之曾孫安平君之孫五官掾之長子也又云

年十有二歲在協洽五月乙巳噓喻不反天隕精晃於是門生東武孫理下密王升等共刊石敘述才美以銘不朽焉其後題光和四年四月五日丁卯立碑舊在濰州昌邑縣近歲移置郡中云

漢逢童碑陰

右漢逢童碑陰題云右家門生右縣中士大夫凡十三人有督郵璉敏賓璉后升司文叔盛姓字按璉與司文姓氏書皆不載今誌於此

漢三公碑

右漢三公碑歐陽公集古錄有北嶽碑云文字殘缺尤甚其可見者曰光和四年以此知爲漢碑爾其文多言珪幣牲酒黍稷豐穰等事其後二人姓名偶可見云南陽冠車馮巡字季祖甘陵夏方字伯陽余嘗託人於北嶽訪求前代刻石幾盡獨無漢碑今此碑所書事及二人姓名與集古所載皆同又光和四年立惟其額題曰三公之碑而集古以爲北嶽碑豈歐陽公未嘗見其額乎三公者山名其事亦載於白石神君與無極山碑三山皆在眞定元氏云